

Unner de Brick iss was los

Om letzde Somsdaachmiddaach hott mich enn gude Freund oogerufe unn gesacht: Du, Honnes, seit e paar Daach habb ich Ängst iwver die Brick nooch Risselsem odder Raunem ze fahrn. Noochdem ich deletz im Fernseh gesehe habb, dass driwwe in Amerika e Brick oigesterzt iss mett Audos unn Mensche, seitdem habb ich Ängst, dass dess aach mett unserne Brick bassiert.

Wie kimmsden doo druff, Seppel, habb ich gefroocht, dass unser schee Betongbrick oisterze det?

Doo sächder: Vor verrzeh Daach bin ich unne om Moo Richtung Hafe spaziern gonge. Weil die Brickepeiler soo schee bemolt sinn – doch, die sinn wirklich zum Oogucke, dess sinn Künstler, die sowas mache, ehrlich –, habb ich merr Zeit genumme unn merr dess alles runderum oogeguckt. Uff oomol bin ich erschrocke, weil mir e paar Dauwe mettem mords Geflatter iwver de Kopp geflooce sinn, ich guck hoch unn trau moine Aache nit. Was ich doo gesehe habb ...

Ich habb gelacht. Enn Haufe Dauwe hosde geseh, odder?

Dem Seppel wars nit nooch Spaß zumut. Naa, koo Dauwe, enn Haufe verroste Eisematte habb ich gesehe.

Werklich, habb ich gefroocht, wo sinnen die?

Also, hotter gesacht, wennde unner de Brick stehe dust, uff de recht Seit von der Liebigstroof her geguckt, doo sinn die Stelle, wo de die verroste Eisematte sehe konnst, weil die paar Millimeter Betong, die doo druff warn, eweck sinn. E paar von dene Eise hänge sogar dorch, hänge richdich nooch unne als dedese bald erunnerfalle, weil die Stäb schunn dorchgerost sinn. Dess iss nor on ooner Stell, awwer die verroste Eise siehsde uffere Streck von mehr wie dreißich Meter iwverall. Also Honnes, dess mussde derr emol oogucke. Unn nit nor weil die Matte oom uff de Kopp falle kenne iss merr die Sach unheimlich, naa, merr kriecht joo Ängst, dass der Rost sich weider frisst unn dass bald die gonz Brick wie in Amerika sesommebreche dut. Honnes, ich konn doch nit jedes Mol iwver Hochem nooch Raunem fahrn.

No ja, habb ich gedenkt, moin Freund Seppel iwwertreibt immer e bissi vill, was werdd der unner de Brick schunn gesehe hawwe, awwer om Sunndaach moie bin ich emol nit in de Woibersche spaziern gonge, naa, ich habb mich unner die Brick gemacht.

Unn de Seppel hott Recht. Dort isses genau so wie der mir dess verzählt hott, unn ich muss saache, dass aach ich enn Schreck kriecht habb. Ess konn joo soi, dass dess alles bekonn iss unn dasses Experte gibt, die wisse, dass desweeche die Brick nit oisterzt, dass merr noch e paar Johr sich koo Gedonke mache muss unn weider iwver die Brick fahrn konn. Doch die rosdische Eise, die doo erumhänge, die kennde sich wirklich bald emol selbständisch mache unn erunnerfalle. Wennse dann oom uff de Kopp falle, dann iss de Deiwel los. Zumindes bei dene misst sofort was gemacht werrn

Owends habb ich de Seppel oogerufe. Seppel, habb ich gesacht, ich werr die Sach oom erzähle, der dess in die Flerschemer Zeidung brenge konn. Donn werdd schunn ooner von de Stadt ontworde. Awwer oons waaß ich schunn jetz: Die rosdische lockere Eise misse eweck unn die onnern Eise misse entrost unn des Gonze widder mett Betong vergosse werrn. Sunnst fällt uns wirklich noch die Brick in de Moo unn mir misse widder mett de Fähr uff die onner Seit.

Eiern Honnes